

四庫全書

集部

欽定四庫全書

集部

歷代詩話卷六十五

詳校官侍讀學士_臣陸伯煊

侍讀_臣孫球覆勘

總校官知縣_臣繆琪

校對官檢討_臣饒慶捷

謄錄監生_臣葉汝鎮

欽定四庫全書

歷代詩話卷六十五

歸安吳景旭撰

壬後集上之上

元詩

月泉吟社

詩評曰詩有六義興居其一凡陰陽寒暑草木禽獸山川風景得於適然之感而為詩者皆興也風雅多起興

而楚騷多賦與比漢魏至唐傑然如老杜秋興八首深詣詩人間興與之入律者宗焉春日田園雜興此蓋借題於石湖作者固不可舍田園而泛言亦不可泥田園而專及舍之則非此詩之題泥之則失此題之趣有因春日田園間景物感動性情意與景融辭與意會一吟諷頃悠然自見其為雜興者此真雜興也不明此義而為此詩他未暇悉論往往叙實者多入於賦稱美者多近於頌甚者將雜興二字體貼而相去益遠矣

第一名羅公福

三山人本姓連名文鳳字伯正號應山

詩曰老我無心出市

朝東風林壑自逍遙一犁好雨秋初種幾道寒泉藥旋
澆放犢曉登雲外壑聽鶯時立柳邊橋池塘見說生新
草已許吟魂入夢招評曰衆傑作中求其粹然無疵極
整齊而不見邊幅者此為冠

第二名司馬澄翁

義烏馮澄字澄翁號來青

詩曰編蘭春思倩吟鞭

著面和風軟似綿黃犢烏犍秧穀候雄蜂紫蝶菜花天
把鉏健婦踏煙壟抱甕丈人分野泉忙事關心在何處

流鶯不聽聽啼鵲評曰起善包括兩聯說田園的而雜興寓其中末語亦不泥

第三名高宇

杭州梁相字必大

詩曰膏雨初晴布穀啼村村景

物正熙熙誰知農圃無窮樂自與鶯花有舊期彭澤歸來惟種柳石湖老去最能詩桃紅李白新秧綠問著東風總不知評曰前聯妙於細合後聯引陶范不為事縛句法更高末借言雜興的是老手

吳旦生曰至元間浦江吳潛齋渭有月泉吟社預於

丙戌小春月望命題至正月望日收卷月終結局請
諸處吟社用好紙楷書以便謄副而免於差舛明書
州里姓號以便供賞而不致浮湛聘詩人謝翱方鳳
吳思齊為考官三月三日揭曉收二千七百三十五
卷選中二百八十名刻至六十名止皆有詩賞者也
第一名公服羅一緇七丈筆五帖墨五笏第二名公
服羅一緇六丈筆四帖墨四笏第三名公服羅一緇
五丈筆三帖墨三笏第四至十名各春衫羅一緇筆

二帖墨二笏第十一至二十名各深衣布一縑筆一
帖墨一笏第二十一名至三十名各深衣布一縑筆
一帖第三十一名至五十名各筆一帖墨一笏吟箋
二沓詩限五七言律以春日田園雜興為題余觀其
韻事雅規標勝來今而評論詩題尤入神解凡作雜
興者皆須領悟此旨也李西涯以未見此集為嫌閩
中徐興公家有藏本錄其佳句如屋角枯藤粘樹活
田頭野水入溪渾青林伐鼓村村社綠水平疇處處

秧土脉正融催敲棘林陰微合聽鉤輶田烏飛逐耕
烟犢桑扈鳴隨喚雨鳩草青隨意牛羊卧門靜無人
燕雀多麥壟風微牛睡穩芹塘泥滑燕歸忙小雨杏
花村問酒淡煙楊柳巷巾車榆莢雨酣新水滑棟花
風軟薄寒收升菴又拈其山歌聒耳烏鹽角村酒柔
情玉練槌皆六十人中警句也

誓詩壇文云月泉舊社久褰詩錦之華季子後人獨
倣禮羅之意遂從昨歲徧致新題春日田園頗多穡

興東風桃李又是一番鄉邦之勝友雲如湖海之英
游雷動古囊交集鉅軸橫陳誰揭青銅尚詢黃髮無
舍女學何至教琢玉哉不用道謀是在主為室者俾
得臣而寓目與舅犯以同心睠惟騷吟良出工苦所
貴相親而善亦多自負所長能雄萬夫定羞與絳灌
等伍如降一等乃待以季孟之間欲辛甘燥濕之俱
齊固甚難以曲直輕重而見欺亦不可念偉事或偶
成於戲劇彼諛言特借譽而揄揚我詩如鄧曹何幸

縱觀於諸老此聲得梁楚誓將不負於齊盟一點無
他三辰在上

黃耳

楊煥然詩音書黃耳絕兄弟白眉良

吳旦生曰陸機有犬名黃耳後仕洛以竹筒盛家信
繫犬頸走向吳至家取答書仍還洛詩僧所云青蠅
為弔客黃犬寄家書是也後犬死還葬機村去機家
二百步聚石為墳村人呼為黃耳塚袁海叟有過黃

耳墓詩考之本傳俱為黃犬劉貢父詩話以為自洛
至吳更歷江淮殆數千里安能諭人而從舟楫子或
者為奴名也余以奴子傳書有何足異至艷千古陳
敬初詩家無黃耳傳鄉信門有蒼頭記客名其非奴
子明矣

五丁

堯山堂外紀曰蜀人唐仲明子西孫也蜀破被俘鬻於
燕市安陸趙仁甫作疏鳩貲贖之疏中有云錦江秀色

都為巴蜀之蕭條玉壘浮雲盡入峨眉之悲慘郝伯常
讀而傷之作蜀亡歎畀仲明為行卷云子規啼缺峨眉
月嘉陵江月半江血青天蜀道為坦途馬蹄蹴落陰山
雪芙蓉城碎朔風急虓虎磨牙綺羅穴不識兵戈三百
年疊鼓一聲肝膽裂坡仙玉里子西孫挺身北走來中
原峨岷秋色橫眉宇骭髀獨倚燕市門時望蘇門一回
首漠漠萬里煙塵昏古言蜀險甲天下一夫扞禦足成
霸前劉後李王復孟虎視中原雄並駕於今底事谷為

陵錦城萬里趨龍庭當時不與秦塞通一天自可延千
齡吾子莫湯嗟飄零厲階權輿實五丁

吳旦生曰華陽國志云秦惠王作石牛五頭朝瀾金
其後曰牛便金蜀人悅之乃遣五丁迎石牛牛既不便
金怒遣還之乃嘲秦人曰東方牧犢兒秦人笑之曰
吾雖牧犢當得蜀也惠王知蜀王好色許嫁五女於
蜀蜀遣五丁迎之還到梓潼見一大蛇入穴中一人
攬其尾掣之不禁至五人相助大呼拽蛇山崩時壓

殺五人及秦五女并將從而山遂分為五嶺其後秦大夫張儀等從石牛道伐蜀蜀王敗績開明氏遂亡盖常璩之所載止此而俗傳以為因金牛之詐蜀使五丁力士開山而谷道始通余按三皇乘祇車出谷口至黃帝為其子昌意娶蜀山氏之女生子高陽是為帝嚳在禹貢為華陽黑水梁州之域及周武伐紂蜀亦從行則豈自秦時始通道中土哉正德中王子衡詩云古峽天中闢鴻荒不記年蔡蒙來禹貢彭濮

記周篇自是并吞易非闕疏鑿然金牛本茫昧世代
浪相傳

鴈帛

輟耕錄曰零落風高恣所如歸期回首是春初上林天
子援弓繳窮海累臣有帛書中統十五年九月一日放
鴈獲者勿殺國信大使郝經書於真州忠勇軍營新館
右五十九字郝公書也公字伯常澤州陵川人中統元
年拜翰林侍讀學士充國信使宋館於真州凡十有六

年始得歸此書當在至元十一年是時南北隔絕但知
紀元為中統也先是有以鴈獻命畜之鴈見公輒鼓翼
引吭似有所訴者公感悟擇日率從者具香案北向拜
昇鴈至前手書尺帛親繫鴈足而縱之後虞人獲之苑
中以聞上惻然曰四十騎留江南曾無一人鴈比乎遂
進師南伐

吳旦生曰農田餘話郝經奉使於宋賈似道忌其露
乞和之盟拘於儀真作帛書附鴈足帛博一寸高五

寸有陵川郝氏印三月虞人獲鴈於汴梁金明池為
安豐教授王時若所得延祐五年集賢學士郭貫出
持准西使節知之奏於朝敕中使取之仁宗裝潢成
卷命翰林集賢文臣題識之藏諸東觀或說世祖有
四十騎留江南曾無一人如鴈之歎遂興師伐宋者
妄也據此則始末與輟耕有異因思一鴈也為子卿
則自北而南為伯常則自南而北然漢廷特飾說以
紿之而陵川一寸帛則實有是事也

姚牧菴

輟耕錄曰姚文公燧玉堂設宴歌妓羅列有一人秀麗
閒雅微操閩音公叩之泣而訴曰妾建寧人氏真西山
之後也父官朔方時貸公帑無償賣入倡家流落至此
公遣使詣丞相三寶努為落籍丞相意公欲侍巾櫛即
檢籍除之公語一小史曰我以此女為汝妻女即以我
為父也京師傳為盛事嘉興貝闕有詩曰斷絲棄道邊
何日緣長松墮羽別炎洲不復巢梧桐昔在至元日六

合車書同玉堂盛文士燕集來雍雍金刀手割鮮酒給
葡萄濃坐有一枝春秀色不可雙叶娉婷劉碧玉綽約
商玲瓏寶釧金雀釵已覺燕趙空或聞操南音未解歌
北風上客驚且疑姓字初未通問之慚復泣乃起陳始
終妾本建寧女遠出西山翁父母生妾時謂是金母童
梨花鎖院落燕子窺簾櫳迢迢官朔方位界食不充侵
貸國有刑桎梏加父躬弼女以自贖白璧淪泥中秋娘
教歌舞屢入明光宮永為倡家婦遂屬梨園工京華多

少年門外嘶青驄不如孟光醜猶得嫁梁鴻自傷妾薄
命失落似秋蓬客聞為三歎天道何憐憫遣使白宰相
削籍歸舊宗小史十八九勿恨相如窮配爾執箕帚今
夕看乘龍鴛鴦並玉樹鸚鵡開金籠棄汝桃花扇紅牙
不復從提瓮自汲水締綌自禦冬時多因輶軻事或欣
遭逢安知百尺井忽登羣玉峰借問為者誰內相姚文
公

吳旦生曰姚牧菴嘗與閻靜軒過張妓怡雲小飲姚

偶言暮秋時三字張應聲作小婦孩兒且歌且笑曰
暮秋時菊殘猶有傲霜枝西風了却黃花事又史中
丞遇牧菴靜軒於道笑曰二先生所往容待行否因
命騶從歸携酒饌同造怡雲姚命張取酒先壽史張
且歌雲間貴公子玉骨秀橫秋水調歌一闋史喜甚
席終左右欲徹酒器皆金玉者史云休將去留待二
先生來此受用後牧菴致政家居年八十猶為侍妾
生一子蓋其情致風逸若此而獨於玉堂落籍為之

擇嫁小史王琬後至顯官誠盛德事也

龍眼

陳剛中作思明州詩元宵已似春深後龍眼花開蛤蚧
鳴

吳旦生曰荔枝龍眼並儼海南荔子自越王通貢楊
妃命騎遂費詞人之形似而龍眼以荔過始熟名為
荔枝亦名亞荔枝焉章碣詩却擁木綿吟麗句便攀
龍眼醉香醪東坡詩顛坑仆谷相枕藉知是荔枝龍

眼來嗣是咏者寥寥而僅見之剛中也所云元宵似
春深見其地暖即薩天錫閩土臘如春之意亦猶四
月熟荔枝稱火山耳

日詢手鏡云蛤蚧乃一甲蟲狀類蜥蜴守宮之屬其
物二者上下相呼北聲蛤壯聲蚧情洽乃交兩相抱
負人以手分擘雖死不開桂海虞衡志云首如蟾蜍
背綠色上有黃斑點若古錦文長尺餘尾絕短傳云
自旦至暮變十二般色傷人必死海錄碎事云大月

三聲小月兩聲

千里

劉夢吉詩埋盆欲學魚千里試地先栽芋一區

吳旦生曰闕尹子以盆為沼以石為島魚環游之不知其幾千萬里不窮也夢吉用此黃山谷詩爭名朝市魚千里亦此意耳或引陶朱公養魚經云以六畝地為池池中有九州則周遠無窮自謂江湖也然無千里字

芥隱筆記云山谷屢用魚千里字尋師訪道魚千里
蓋世功名黍一炊又小池已築魚千里隙地仍栽芋
百區余按前二句山谷復改曰從師學道魚千里蓋
世功名黍一炊後二句直是夢吉粉本

滕韻

呂微之雪詩有云天上九龍施法水人間二鼠啣枯藤
鶯鶯聲亂功收蔡蝴蝶飛來妙過滕

吳旦生曰天台呂微之博學能文一日詣富家易穀

種值大雪立門下聞東閣中分韻作雪詩一人得滕
字苦吟弗就不覺失笑閣中貴游輩聞之詢其見笑
之由乃曰我意舉滕王蛺蝶事耳始邀入坐衆以滕
滕二字請即援筆書此二聯復請和曇字韻又隨筆
寫云竹委長身寒郭索松埋短髮老瞿曇寫訖便出
門問姓字亦不答皆驚訝曰嘗聞呂處士名豈其人
耶惠之穀怒曰我豈取不義財必易之而去遣人尾
其後雪晴往訪焉惟草屋一間忽米桶中有人乃妻

也天寒故坐其中試問徽之先生何在答曰溪上捕魚始知真為徽之矣至彼果見之隔溪謂曰諸公先到舍我得魚換酒來也少頃携魚與酒至盡歡而散翌旦徽之已遷居矣

玉帶

輟耕錄曰龍麟州過福建憲府設宴命官妓小玉帶佐觴憲使請曰今日之歡皆玉帶為也願酬以詩麟州負海內重名雅畏清議又不能違憲使之請遂書一絕句

云菡萏池邊風滿衣木樨亭下雨霏霏老夫記得坡仙
語病體難禁玉帶圍蓋前輩既不拂人之意又不失所
守而且用事清切一時風致非野儒俗士所能及也

吳旦生曰佛印住潤州金山寺東坡過潤見之師云
內翰何來此間無坐處坡戲云楚偕和尚四大用作
禪牀師云山僧有一轉語內翰言下即答當從所請
稍涉擬議所繫玉帶留鎮山門坡許之師云山僧四
大本無五蘊非有內翰欲於何處坐公未即答師呼

侍者收此玉帶取衲裙相報因有二絕坡次韻云病
骨難堪玉帶圍鈍根仍落箭鋒機欲教乞食歌姬院
故與雲山舊衲衣後之用其事者如張起題納延金
臺集云玉帶難圍老病身唐桂芳送程仲庸留金山
寺云玉帶慙拋煩轉語楞伽曾寫悟前身皆遜步於
麟州矣

別齒籤

蓉塘詩話曰趙松雪老態詩老態年來日日添黑花飛

眼雪生髯扶衰每藉過頭杖食肉先尋剔齒籤右臂拘
攣巾不裹中腸慘憾淚常淹移床獨就南榮坐畏冷思
親愛日簷徐延之云非身處老境真知灼見者不能諳
此

吳旦生曰仙人鄭思遠常騎彪故人許隱齒痛求治
鄭拔彪鬚及熱挿齒間即愈陸雲與兄機書云近日
復案行曹公器物取其剔齒籤一筒今送兄一本趙
詩籤作纖按即籤字也

九鼎

宋子虛詩列國皆貪禹鼎神周衰三代寶先淪不知璽
奉高皇日曾問當時果在秦

吳旦生曰禹鑄九鼎於甘讒之地故曰讒鼎服氏注
以為疾讒之鼎非是而韓非子作饒鼎亦悞也夏都
平陽及安邑桀亡鼎遷來亳乃隔河也書稱周遷商
鼎武王遷河以南而安置未善故成王定鼎於郊鄒
周本紀云秦取九鼎寶器而遷西周君於愚狐水經

注云周顯王時九鼎淪沒泗淵秦始皇時而鼎見於
彭城始皇自以德合三代大喜使數千人沒水求之
不得所謂鼎伏也系而行之未出龍齒啣其系故語
曰稱樂太早絕鼎系滿水李氏辨之曰是時泗水在
彭城宋之分九鼎何緣而至宋夫取九鼎者秦昭襄
也始皇乃莊襄之子也然觀舒雅云周威烈王二十
三年九鼎震震者淪之兆則能震豈不能沒哉蓋秦
有并吞天下之志不得鼎無以取重於天下故託言

入秦也乃知昭襄之世既書鼎入秦而始皇二十八年又書沒泗求鼎此史氏之微辭也

文獻通考云赧王五十九年周亡秦昭王取九鼎其一飛入泗水餘八鼎入於秦中

秦女

宋子虛咏秦少游女云父貶滕陰老淚潛黃金誰贖一姬還看來山抹微雲後直送娥眉出曉關

吳旦生曰靖康間有女子自稱秦學士女道中題詩

云眼前雖有還鄉路馬上曾無放我情讀者悽然曾
裘父為作秦女行

按少游夢中作好事近長短句有醉卧古藤陰下了
不知南北之句後自貶所歸卒於滕州殆成讖語故
晁無咎弔詞云醉卧藤陰黃山谷詩西風吹淚古滕
州陳剛中詩今夜更遊臺上月不堪重照古藤陰

少游蓬萊閣席上賦長短句首言山抹微雲天粘衰
草極為東坡所稱呼之為山抹微雲君又嘗戲云山

抹微雲秦學士露花倒影柳屯田故范元實

祖禹之子

為

少游壻作詩眼一卷嘗在歌舞之席終日不言妓有
問之曰公亦解辭曲否笑答曰吾乃山抹微雲女壻
也

至他

宋子虛詩壺減固自知名久何處更能求邳他

吳旦生曰史記韓長孺傳於梁舉壺遂減固邳他皆
天下名士索隱云邳音質他徒河反人姓名也漢書

作至他蓋謂壺減之外至於他有所舉皆名士也余
按邳者商時候國其在漢則自邳惲邳壽邳都邳伯
尚而外無聞焉子虛作詩以正史氏之謫如吟嚙一
集當與楊鐵崖咏史樂府並傳

馮海粟稱其五言律風調悽惋不勝江哀浦思之情
悵如承恩金馬詔失意玉環詞落月今誰弔長星夜
自明雖使太白復生亦應為之擊節七言律楊柳昏
黃晚西月梨花明白夜東風秋千庭院人初下春半

園林酒正中五言如乙鳥歸來社辛夷開過春如身
黃松上鼠頭白竹間禽七言如桃葉歌殘秣陵酒梨
花夢斷景陽鐘五言如採藥逢毛女焚香對羽人如
客愁三月盡春夢五更初七言如縮地日携龍作杖
卧雲時約鳳吹笙五言若蜀魄花成血山魃樹隱身
竹枝歌峽夜椰子醉蠻春如空悲祖龍死但覺鮑魚
腥如織女支機穩山人作枕便異或稱羊化疑應訝
虎眠不須填碧海直欲補青天如勒銘留水寺應供

宿江城夏減游方興秋添住岳情標致極似盛唐諸
人而對偶之工興寄之永飄飄然自拔於王金陵舍
風鴨綠粼粼起弄日鵝黃裊裊垂北風吹樹勁西日
照窗涼之頂顙

病齒圖

宋子虛題玉環病齒圖云一點春寒入瓠犀海棠花下
獨顰眉內厨幾日無宣喚不問君王索荔枝

吳旦生曰風刺隱約正以婉勝如馮海粟題云華清

宮一齒痛馬嵬坡一身痛漁陽鼙鼓動地來天下痛
則又以快勝矣余後觀薩天錫題云一點春酸入瓠
犀雪色鮫綃濕香唾又云君不聞華清宮一齒作楚
藏禍根又不聞馬嵬坡一身濺血未足多漁陽一日
鼙鼓動始覺開元天下痛似合子虛海粟之語彙括
成文然其較本色加劣矣

子虛又題玉環聯轡圖云赭袍紅映鏤金衣笑並花
驄酒力微試問六龍西幸日有人曾侍翠華歸因故

陳伯敷題楊妃上馬嬌圖云此索清平調詞赴沈香
亭時耶抑聞漁陽鼙鼓聲赴馬嵬坡時耶上馬固相
似情狀大不同觀者當審諸

岑靜能題太真春睡圖有云漁陽鼙鼓邊塵動臺閣
無言卿士憎婦人一睡四海昏主闇臣諛總如夢

濟之

宋子虛詩域開仁壽民能濟未濟還驅天橫鄉

吳旦生曰禮樂志王吉曰延及儒生述舊禮明王制

驅一世之民濟之仁壽之域王吉本傳亦作濟今俗作躋顏氏注域界也若是躋字合注登陟之義域平履之區非有崇高之意何故以登陟為文舒子史纂言曰未濟則民在天橫之鄉既濟則民履仁壽之域濟字之義為長而世俗作躋莫知其故

鴛瓦

雅正卿咏洛神云鄴宮簷瓦似鴛飄蘭渚鳴鑾去國遙吳旦生曰鄴中記鄴城銅雀臺皆鴛鴦瓦又魏志文

帝問周宣云吾夢殿屋兩瓦墮地化為鴛鴦何也宣
曰後宮當有暴死者帝曰吾詐卿耳宣曰夫夢者意
耳苟以形言便占吉凶言未卒黃門令奏宮人相殺
杜子美詩殿瓦鴛鴦圻楊庶夫詩飄風吹落鴛鴦瓦
皆用此意

清容

袁伯長芳思亭詩以茲一畝園髣像見疇昔幽葩與羣
卉生意日不息朝陽漱靈根三咽妙紉繹曠懷事幽賞

誓矣躬六籍

吳旦生曰芳思亭者為其先尚書公治圃南郊有堂
亭十五荒廢不可考築一亭髣其萬一故稱芳思又
謝俞光遠為治別墅詩種竹澆花俟我還花成雲塢
竹成山蓋其選勝結茆性耽恬適有足述者君諱楠
字伯長清容其號所著詩為清容集本四明人讀書
吳興有清容書院後人題云人同綠水長為主座有
青山不計年至今葺其址新之署曰清容

蘆花被

貫酸齋賦蘆花被詩採得蘆花不浣塵翠蓑聊復藉
為裯西風刮夢秋無際夜月生香雪滿身毛骨已隨天
地老聲名不讓古今貧青綾莫為鴛鴦妬欸乃聲中別
有春

吳旦生曰酸齋過梁山灤有漁翁織蘆花為被欲易
之以紬者翁卻紬曰君尚吾清願以詩輸之故為賦
此竟持被去酸齋至錢唐因自號蘆花道人丘彥能

家藏蘆花被圖一幅貢泰甫吳子立吳敬夫題其上
自此以為佳事往往入咏成原常詩薺菜登盤甘似
蜜蘆花紉被暖如綿洪武中孫彥舉詩竹葉杯中閱
四時蘆花被底舒雙脚

曹石倉云咏物詩如鶴骨笛

賈策詩九皋聲斷楚天秋玉頂丹砂一夕休枯

朽挽回生死詞淒涼吹盡古今愁魂歸遠海雲迷樹
曲罷江城月滿樓惆悵主人三弄罷杳無消息到揚

州走馬燈

謝宗可詩曉輪擁轉駕走精飛繞人間不
夜城風聲追星低弄影霜蹄逐電去無聲

秦軍夜潰咸陽火吳炬宵馳赤壁兵
更憶雕鞍年少客章臺踏碎月華明
蘆花被之類極

其工巧以求速肖而風人比興之義鮮矣然石倉終
愛其詩有和蘆花被云輕如阿縞軟於綿疊上匡牀
野性便一幅瀟湘全勝畫五更風雨不成眠迴文豈
藉秦娘織席地將同子敬氈白露薰葭堪作伴伊人
猶在夢江邊

道衣

薩天錫詩洞門花落無人迹獨坐蒼苔補道衣

吳旦生曰輟耕錄載王守素民家女其夫丁棄家為

道士於吳山紫陽菴一日召守素入山書付四句云
嬾散六十三妙用無人識順逆兩俱忘虛空鎮常寂
坐抱一膝而逝守素亦束髮簪冠着道士服奉夫遺
屍二十年迹不下山年逾七十幾於得道者薩天錫
贈之詩

看雨

閒中今古錄曰薩天錫有一詩送濬天淵入朝地濕厭
聞天竺雨月明來聽景陽鐘聞者無不膾炙惟山東有

一叟鄒之公以素愜意特步訪問其故叟曰此聯措辭
固善但聞字與聽字一合耳公曰當以何字易之叟徐
曰看天竺雨公詰其看字叟曰唐人有林下老僧來看
雨公俯首拜為一字師

吳旦生曰郎士元送錢大起句云暮蟬不可聽落葉
豈堪聞間氣集謂謝朓工於發端比之於今有慚沮
矣吳逸一則以兩句一意評之亦正嫌聞字與聽字
一合也如姚崇夜渡江詩聽草遙尋岸聞香暗識蓮

蓋從夜落想則又聽與聞不妨並用其結句云惟看
孤帆影常恐客心懸唐仲言以暗中摸索忽下惟看
字覺有礙改惟為怯則通篇渾成余謂怯看不成語
此二句即楚王心搖搖如懸風中之旌之意仍是暗
中作想凡詩家用看字都不可泥

祖詠詩海色晴看雨鐘聲夜聽潮直是天錫二語先

鞭不獨林下老僧句也

考天錫本集作寄賀天竺長老詵笑隱名住大龍翔集慶

寺蓋大詵住杭中天竺文宗名赴闕故云天竺雨
景陽鐘也堯山堂外紀又以改看字為虞伯生

秋宮詞

古今說海曰薩天錫秋宮詞清曉宮車出建章紫衣小
隊兩三行石闌干外銀燈過照見芙蓉葉上霜初讀若
汎言一時事細玩之則見深宮寂寞望幸不到氣象且
造語渾然追踪盛唐若此者亦不多見

吳旦生曰備遺錄載天錫宮詞十八絕謂此第十五
首也又楊蕪夫宮詞小序云宮詞詩家之大香奩也
不許村學究語為本朝宮詞者多矣或拘於用典故

又或拘於用國語皆損詩體天厯間予同年薩天錫
善為宮詞且索子和什通和二十章今存十二章然
余觀天錫詩集止載春詞秋詞二章秋詞即前所錄
其春詞云深宮盡日垂珠箔別殿何人度玉箏白面
內官無一事隔花時聽打毬聲二詞情事欲絕其餘
所云者皆別立他題亦有本集所不載者

雙書

納延送葛子熙詩高槐疎雨作新涼猶記雙書白玉堂

吳旦生曰劉向別錄言讐校書一人持本一人讀對
若怨家故曰讐書漢庾乘傳諸生博士皆就讐問北
齊書邢子才有書甚多而不甚讐校嘉祐中置編校
官八員雜讐四館書馬虛中詩注易麻衣才脫藁讐
書光祿罷傳經洪希文詩一春正坐讐書忙
海錄碎事云司馬遷為太史令紬書史記石室金匱
之書注紬謂綴集之音冑

劉蕢祠

納延作劉蕡祠詩云鞠躬荒祠下低迴想遺直劉君素
忠憤伏闕論邦國痛陳腹心禍竟罹考功斥餘子盡騫
騰鬱鬱負慚色鄉人仰高誼千載崇廟食題下自注云
唐劉蕡幽州昌平人謫死柳州歷遼金無能發潛德至
本朝天歷間昌平驛官宮祺始奏建劉諫議書院

吳旦生曰帝京景物略云昌平劉蕡唐文宗時憤官
官恃功專權應制對策極言禍福第策官左散騎長
侍馮宿等讀蕡策嗟服而畏忌不敢取時叅軍李邵

登第乃上書自劾乞回所授以旌黃直後七年甘露
難作令狐楚牛僧孺皆表黃幕府師禮禮之而宦官
深嫉黃誣以罪貶柳州司戶叅軍卒後昭宗感羅衮
言贈諫議大夫謚文節封昌平侯元泰定間建祠州
西南五里曰諫議書院至正間又建祠舊州東叅政
許有壬撰碑明弘治間談本彝移建學宮內今圯焉
唐時李商隱贈云漢廷急詔誰先入楚路高歌自欲
翻萬里相逢歡復泣鳳巢西隔九重門及黃卒復哭

之曰已為秦逐客復作楚冤魂併將添恨淚一洒問
乾坤後之謁劉祠作詩者李東陽詩香火制存身後
廟策時書在閭廛封程敏政詩氣節可興天下士蒸
嘗無愧社中師王鏊詩氣帶幽并多感慨策如鼃董
亦迂疎同時下第誰云屈此外求言總是虛周用詩
千古直臣唐諫議一篇正學魯春秋劉龍詩一介布
衣天下計滿梁華月古人顏趙貞吉詩一策乾坤正
氣收當時朋輩至今羞沙連塞草寒三畝葉和村煙

覆一邱陳仁錫詩布衣修諫草媿已在三公何直登
科日能生策士風胡江詩士賤豈經時宰慮主憂惟
望侍臣知

粧臺

納延賦粧臺詩誰憐舊時月曾向日邊明

吳旦生曰易之與危太朴等游南城各賦十六首以
紀遺蹟粧臺其一也按梳粧臺在都城東北隅李妃
所築

今訛為蕭太后梳粧樓

妃嘗與金章宗露坐上曰二人土

上坐妃應聲曰一月日邊明上大悅

貢泰甫云易之果囉羅氏也在西北金山之西與回紇壤相接俗相類其人便捷善射又能相時居貨謀取富貴易之世出其族而心之所好獨異焉宜乎見於詩者亦卓乎有以異於人也

感策

納延挽諤勒哲圖都元帥四首有云感策按歌吹落月鬪牒
盛酒醉西風

吳旦生曰感箎羌人吹角也以筚為首以竹為管其部在管音前故名頭管唐編鹵簿名為筚管樂書又名風管所法者角音故曰角即今畫角白樂天感箎詩剪削乾蘆插寒竹九孔漏聲五音足差備其制

諺云三九二十七籬頭吹感栗言冬至後寒風吹籬落其聲似感栗幽風所謂一之日感發也幽風說文感作畢朱晦菴云箎箎元名悲栗言其聲悲壯也悲感畢三聲相沿

按帥嘗漆倭人首為飲器

送行

廼賢送楊梓人守閩州兼寄宣慰家兄詩朱轡五馬出王
庭父老西南望福星家世久聞清白吏文章爭誦太玄
經岷江水落嘉魚美劍閣春晴檀木青若過眉州見蘇
子卯君京國尚飄零

吳旦生曰起語道出守意三四指楊氏五六指蜀地
以寄家兄作結自注云東坡稱子由為卯君

藝苑雌黃云檜字徧尋字書皆無蜀中多此木詢之
蜀人則相傳以為丘宜切按介甫絕句檜與移字同
押則知丘宜切為是也漁隱叢話云檜木惟蜀中有
之散材而美蔭易長而可薪杜子美覓檜木栽詩飽
聞檜木三年大與致溪邊十畝陰堂成詩檜林礙日
吟風葉籠竹和煙滴露梢蘇子瞻送戴蒙詩茅魁徑
尺誰能畫檜木三年已足燒次介甫韻詩斫竹穿花
破綠苔小詩端為覓檜栽木山詩二頃良田不難買

三年檜木行可題宋子虛野步詩翳日檜陰翠幄遮
葑園高下夾枰斜馬伯庸題畫詩蜀檜陰十畝閩荔
熟千房正德中王守谿送劉規還蜀詩古栢祠前傷
草色浣花溪上覓檜栽

歷代詩話卷六十五

欽定四庫全書

歷代詩話卷六十六

歸安吳景旭撰

壬後集上之中

元詩

四大家

輟耕錄曰嘗有問於虞伯生曰仲弘詩如何伯生曰仲弘詩如百戰健兒德機詩如何曰德機詩如唐臨晉帖

曼碩詩如何曰曼碩詩如美女簪花先生詩如何笑曰
虞集乃漢廷老吏蓋先生未免自負公論以為然

吳旦生曰元詩以虞待制

伯生諱集

楊編脩

仲弘諱載

范應奉

德機諱棟

揭應奉

曼碩諱孫斯

為稱首謂之四大家唯趙承旨

松雪諱孟頫

得顏顏其間李元仲云豫章三日新婦

揭蒲

城百戰健兒

楊

蜀郡唐臨晉帖

虞

清江漢法令師

范

語與輟耕小異揭曼碩為德機詩序云伯生嘗評仲
弘詩如百戰健兒德機如唐臨晉帖以予為三日新

婦而自此漢廷老吏也又與元仲小異堯山堂外紀
云揭聞三日新婦之語不悅嘗中夜過伯生問及茲
事一言不合揮袂遽去後以詩寄伯生曰奎章分署
隔窓紗不斷香風別殿花留守日頒中賜果宣徽月
送上供茶諸生講罷仍番直學士吟成每自誇五載
光陰如過客九疑無處望重華伯生得詩謂門人曰
揭公才力竭矣就答以詩云故人不肯宿山家夜半
驅車踏月華寄語旁人休大笑詩成端的向誰誇并

題其後云今日新婦老矣揭召至都果疾卒

伯生

麓堂詩話曰極元之選惟劉靜脩虞伯生二人皆能名家世恒為劉左袒予獨於虞有取焉

吳旦生曰輟耕錄載楊仲弘每言伯生不能作詩虞載酒問作詩之法楊既酒酣盡為傾倒虞遂超悟其理繼有詩送袁伯長扈駕上都以所作詩介他人質諸楊楊曰此非伯生不能也或曰先生嘗謂伯生不

能作詩何以有此曰伯生學問高子曾授以作詩法
餘莫能及又以此詩詣趙松雪有山連閣道晨留輦
野散周廬夜屬橐之句趙曰若改山為天野為星則
尤美虞深服之

詩話類編曰伯生在宜黃時嘗倚樓吟詩有五更鼓
角吹殘雪之句忽隔溪一童揖而言曰角可吹鼓不
可吹亟命名之已失所在蓋詩鬼也

滕王閣

麓堂詩話曰胡澹菴集載虞伯生滕王閣三詩其曰天
寒高閣立蒼茫百尺闌干送夕陽曰燈火夜歸湖上雨
隔簾呼酒說干將信非伯生不能作也今道園遺稿如
此詩者絕少

吳旦生曰葉盛謂道園文集往時劉伯溫所刻大字
本有歐陽圭齋序今板已亡矣近見崑山新刻幹克
莊建本遂於先生四世從孫虞湜家摸得此序并書
一通冠諸首云然則伯生詩文散落必多今本之所

無安知非大字本所有耶李西涯極許伯生故特蒐
其逸句又稱伯生畫竹詩古來篆籀法已絕祇有木
葉雕蠶蟲畫馬詩貌得當時第一匹昭陵風雨夜聞
嘶成都詩賴得郾筒酒易醉夜歸衝雨漢州城真得
少陵家法

詩話類編載辛好禮諸人問伯生曰西江登眺之所
據江山之勝無踰於滕王閣望湖亭二處公幾過皆
不留題何也伯生曰諸公曾見東坡及僧晦幾詩否

請與誦之晦幾滕王閣詩云檻外長江去不回檻前
楊柳後人栽當時惟有西山在曾見滕王歌舞來四
句含無窮之意寓無窮之感東坡望湖亭詩云黑雲
翻墨未遮山白雨跳珠亂入船驚地風來忽吹散望
湖亭下水連天陰陽變化開闔於頃刻之間其氣雄
語壯所謂吞雲夢者二詩皆不可及是以無題也

餘冬序錄云胡順菴集記伯生最愛晦幾此詩至登
閣不敢留題一日為諸生所強乃即席賦三律并一

絕其絕句云豫章城上滕王閣不見鳴鑾佩玉聲惟
有當時簾外月夜深依舊照江城或謂此劉夢得石
頭城語予以為只是要翻晦幾意耳黃鶴樓崔李事
與此相類前輩服善每如此三律者天寒江濶立蒼
茫百尺闌干送夕陽歲久魚龍非故物春深蛺蝶是
何王帆檣星斗通南極車蓋風雲接豫章燈火夜歸
湖上雨隔林呼酒說干將高閣城頭戶牖開江中照
見碧崔嵬文章誰復三王後雲氣長從五老來畫角

數聲南斗落白鹽萬斛北風回洲南先有蛟龍窟恠
得詩成急雨催危樓百尺倚闌干滿目青山不厭看
空翠遠凝江樹小落霞飛送酒杯乾千年劍氣侵牛
斗半夜天香下廣寒我欲乘鸞朝帝闕五雲深處是
長安李西涯嘗誦之為予言宋元來學杜之作惟虞
為近而虞此詩尤近杜者此詩今載道園遺稿

詩話類編又云吳江虞拳言家有伯生三像其一素
冠竹杖其一自書遯乎千載之讚其一歸休戴笠圖

自書四律詩今道園學古篇道園遺稿皆無之其辭
曰浮雲滿空無所依高岡獨峙來者稀仙人冉冉遺
松老鳴鹿呦呦生草肥伐木遠聞何處谷傾筐近得
故時薇山中欲雨露先合此日先生戴笠歸又南園
多竹暑氣微由來結屋相因依掛巾石壁晝霧濕沐
髮池水朝陽晞頻年車馬踐霜雪六月裳衣無綵絺
隣翁問舊坐來久此日先生戴笠歸又老去懸車百
慮灰西風獨愛菊花開田家酒熟邀客去茅屋詩成

懶更裁欲及天清飧沆瀣要觀日出上蓬萊赤松有
約應相待此日先生戴笠來又莫問隣家駟馬車此
身全不要人扶雲霄一羽山頭杜風雨孤村海上蘇
薄命長鑱尋積雪多情破帽落輕烏莫圍玉帶垂朱
紱此是先生戴笠圖然余觀道園學古篇却載此詩
題云陳可復為予寫戴笠圖賦詩四首又見一絕題
陳可復所寫像云歸來江上一身輕野服初成拄杖
行祇好白雲相伴住天台廬阜聽松聲此所謂素冠

竹杖之一像耶

草木子云伯生幼年過薊門酒樓題詩於壁曰連十八書其詩曰耳目聰明一丈夫飛行八極隘寰區劍吹白雪妖邪滅袖拂春風朽槁蘇氣集酒酣雙國士情如花擁萬天姝如今一去無消息只有中天月影孤當時皆以為呂洞賓作爭傳誦之

撥鐙

楊升菴曰虞伯生題畫古木詩後主撥鐙法蓋江南李

後主云書有七字法謂之撥鐙法曰擗壓鉤揭抵導送也鐙古燈字撥鐙畫沙懸針垂露皆喻言撥鐙如挑燈不急不徐也楊鐵崖與顧玉山聯句云書出撥鐙侵繭帖可証其音讀

吳旦生曰此後主書迹述所云也錢若水云陸希聲得筆法凡五字擗壓鉤揭抵用筆雙鉤則點畫遒勁而盡妙矣謂之撥鐙法希聲以授沙門訥光光入長安為翰林供奉江南後主亦得此法復增二字曰導

送王氏談錄云江南李主及二徐傳二王撥鐙筆法
中朝士人吳遵路待詔尹希古悉得之吳尤以為秘
所傳二人與范宗傑而已其法五字撇厭抵鈎揭吳
又云更有二字曰蹲送者蹲鋒迎送之謂耳據此則
本是五字而後增之為七字矣然觀林韞撥鐙序則
其字又有異者序略云廬陵廬肇忽相謂曰吾昔授
教於韓吏部其法曰撥鐙今將授子子勿妄傳推拖
撚拽是也

解大紳云執筆之法虛圓正緊又曰淺而堅謂撥鐙令其和暢勿使拘攣真書去毫端二寸行三寸草四寸掣三分而一分着紙勢則有餘掣一分而三分着紙勢則不足此其要也而撮捺鈎揭抵拒導送指法亦備其曰撮者大指當微側以甲肉際當管傍則善而又曰力以中駐中筆之法中指主鈎用力全在於是又有扳魯法食指挂上甚正而奇健撮管法撮聚管端草書便提筆法提掣其筆署書宜此執筆之功

也

說文鐙錠也從金登聲徐鉉曰錠中置燭故謂之鐙
急就篇顏注鐙所以盛膏夜燃燎者也其形若杆而
中施釭有柎者曰鐙無柎者曰錠柎謂下施足也按
古無鐙字至漢祠太乙自昏至曉燃燈故有七枝燈
百枝燈之類然上林賦鐙字從金旁是以五金鑄之
也宋玉招魂云蘭膏明燭華鐙錯些梁簡文有列鐙
賦陳後主有光壁殿遙咏山鐙詩劉公幹詩明鐙燐

炎光岑嘉州詩寒鐙靜深屋高達夫詩高館張鐙酒

復清蓋鐙本是古字宜待鐵崖詩証其音讀耶

玉山草堂

集鐵崖詩
作撥燈誤

牛衣

虞伯生詩牛衣春夢鬢蒼浪

吳旦生曰演繁露王章卧牛衣中注龍具也龍具之
制不知何若按食貨志董仲舒云貧民常衣牛馬之
衣而食犬彘之食然則牛衣者編草使暖以被牛體

蓋蓑衣之類也劉蕡詩王章莫耻牛衣淚潘岳休驚
鶴鬢霜陸放翁詩牛衣未起王章疾馬磨何傷許靖
貧蓋用此也又陸魯望詩病中祇自悲龍具世上何
人識羽袍陸放翁詩生涯破碎餘龍具學問荒唐守
兔園則復用注中語

枕櫛

虞伯生題儋耳東坡載酒堂云翳翳儋耳城歷歷枕櫛
樹

吳旦生曰海槎餘錄謂載酒堂即蘇長公寓儋耳遊宴之地也今有堂三楹祀公像於中元庶訪使伯琦周公隸書碑文一道列堂東隅堂周遭有牆相去百步有塘寬百餘畝水土深淺異處蒲菰蘆葦之屬最茂密每春秋二祀例率郡僚師儒會飲堂中即漁此塘以為樂名濁勞會亦洗闔境諸祀之勞之謂也故傳乳井泉枕榔菴茉莉軒今皆湮廢遺址尚存

枕榔木類紵櫟樹樹杪挺出數枝每枝必贅青珠數

條每條不下百餘顆計一樹可得青珠百餘條團團懸掛若傘蓋然可愛也其木最重番舶用為鎗以代鐵其鍾重鋒銛侔於鐵也東坡寄文潛枕柳杖詩江邊曳杖枕柳瘦林下尋苗華撥香迷異記枕柳皮裹出屑如麪用作餅食之與麪相似因謂之枕柳麪蜀都賦麪有枕柳伽藍記所謂麪木是也

松煙

楊升菴曰朱萬初善製墨純用松煙蓋取三百年推朽

之餘精英之不可泯者用之非常松也天曆乙巳開奎
章閣揀儒臣親侍翰墨榮存初喀喇子山皆侍閣下以
朱萬初所製墨進大稱旨得祿食藝文館虞伯生贈詩
云霜雪摧殘澗壑非深根千歲斧斤違寸心不逐飛煙
化還作玄雲繞紫微蓋紀茲事也

吳旦生曰上古無墨竹挺點漆而書中古方以石磨
汁至魏晉時始有墨丸乃漆煙松煤夾和為之曹子
建所謂墨出青松煙而晉人多用凹心硯者欲磨墨

貯潘耳或謂燎松丸墨起於唐王方翼不知前此已
有也唐高麗歲貢松煙墨用多年老松煙和麋鹿膠
造成唐末奚超與子廷珪至歙州其地多松因留居
以墨名家尚用松煙宋元佑間潘谷作墨東坡謂其
雜用高麗煤故詩云徂徠無老松易水無良工珍材
取樂浪妙手惟潘翁亦用松煙也熙豐間張遇供御
墨用油煙入腦麝金箔謂之龍香劑徽宗以蘇合油
搜煙為墨金章宗購之一兩墨價黃金一斤伯生又

有跋云近世墨以油煙易松煙嘗謂松煙墨深重而不姿媚油煙墨姿媚而不深重若以松脂為炬取煙二者兼矣

行李

楊仲弘作劉將軍詩云往年鄂州省綏靖失其理交馳赤白囊來告犯邊鄙遣人覘虛實在廷孰可使矯矯劉將軍一旦備行李

吳旦生曰左傳僖公三十年行李之往來共其乏困

襄公八年亦不使一介行李告於寡人此用李字昭
公十三年行理之命無月不至國語行理以節送之
此用理字騎官左角曰理史記天官作李管子書大
理皆作李古文二字通用然觀杜預注左云行李使
人也後之遠行束裝稱為行李而不知是行使也按
舊文使字作岑使字山下傳寫之悞遂作李焉今仲
弘所用乃得使字意劉孝威結客少年場行云少年
李六郡遨遊遍五都李作使音

麥光

楊仲弘詩麥光人共賞棘刺巧無窮

吳旦生曰蜀中方物記紙曰麥光杜子美詩麥光鋪
几淨無瑕蘇子瞻詩香雲靄麥光王原吉詩儻寄麥
光牋子瞻云海東羅文麥光紙堅韌異常

贈石塘

楊仲弘贈胡石塘詩先生惟達道久矣樂山林致聘無
雙璧為生過千金身閒雲出岫髮短雪盈簪遁世猶吾

志同盟欲自今

吳旦生曰婺州三胡先生長誠仲次穆仲次汲仲而
石塘乃汲仲號也清介孤高仲弘一詩字字為其實
錄趙松雪嘗為羅司徒奉鈔百錠為石塘潤筆請作
乃父墓銘石塘怒曰我豈為宦官作墓銘耶是日正
絕糧其子千里以情白坐上諸客咸勸受之卻愈堅
送蔡如愚歸東陽詩薄糜不繼襖不煖謳吟猶是鍾
球鳴嘗語惟善曰此予秘密藏中休糧方也

東園友
聞云趙

松雪挽胡穆仲詩淚濕黔婁被情
傷郭泰中觀此則其為人可知矣

相於

楊仲弘送范德機詩往歲從君直禁林相於道義最情
深

吳旦生曰繁欽定情詩何以結相於金薄畫搔頭唐
太宗詩此時歡不及調軫坐相於杜子美詩良友幸
相於元稹詩未面西川張校書書來稠疊頗相於劉
得仁詩便欲去隨為弟子片雲孤鶴肯相於按相於

即綢繆也德機有云浦君高價本璠璣多幸薰葭得
所於亦此義

杰句

范德機詩黃河西去從天下泰華東來拔地高

吳旦生曰此德機杰句有涵蓋有振盪不徒以氣象
求之如云日月雙吟鬢乾坤獨病身又云乾坤雙蠟
展江海一漁舟又云世故風塵雙短屐生涯天地一
扁舟三詩辭致若一旦俱在頸聯要其興會所屬意

到筆落不自知其髣髴也生平與仲弘契分談詩最
合故德機有進三朝實錄詩三后龍光周典冊羣臣
鵠立漢衣冠仲弘則有寄袁伯長詩祀事悉稽周典
禮頌聲須假漢文章又西曹郎事詩李耳舊藏周典
禮蕭何元得漢圖書即兩人各自意到筆落亦不自
知其髣髴也

糞巷

范德機詩門巷祇今埋糞壤輪蹄自昔走雷霆

吳旦生曰東坡因子過讀南史卧而聽之語過曰王
僧虔居建康禁中里馬糞巷子孫實實謙和時人稱
馬糞諸王為長者東漢贊論李固云視胡廣趙戒如
糞土糞之穢也一經僧虔便為佳號而以此胡趙則
糞有時而不幸汝可不知乎今德機詩正用王僧虔
事

鬼趣

草木子曰危太樸嘗與范德機秋夜同步德機得二句

云雨止脩竹間流螢夜深至喜甚既而曰語太幽殆類
鬼作不復綴筆

吳旦生曰此德機感秋詩也集中具有全作豈終自
眷惜為之綴筆耶詩云蒼山秋意長池館靜而閨雨
止脩竹間流螢夜深至羲黃世已遠雅俗日凋弊舉
手遏頽波誰識作者意烏啼魯東門泗水不染袂後
出三千年直可肩聖智機關係風化詞語特細事月
落閉虛簾坐夢太古帝揚眉順玉色盡發養生秘勿

謂仙學難此道可立致觀其託旨深長寄懷神聖蓋
將示來學以趨歸其自家胸次豈復墮鬼趣哉要知
類鬼一語卽是其教來學者知所避就爾

庾樓

揭曼碩過江州詩落日照庾樓驚風滿湓浦

吳旦生曰世說庾亮在武昌秋夜景清殷浩王胡之
之徒登南樓理咏庾公步來諸賢欲起避之公徐云
諸君少住老子於此處興復不淺因據匡牀與諸人

咏謔據此則武昌事也范石湖吳船錄云泊江州登
庾樓前臨大江後對匡廬名山大川悉萃此樓庾元
規故事本是武昌南樓後人以元規嘗刺江州故亦
以庾名然景物則有南樓不逮者陸放翁入蜀記云
庾亮嘗為江荊豫州刺史其實則治武昌若武昌南
樓名庾樓猶有理今江州治所在晉特柴桑縣之湓
口關耳此樓附會甚明然白樂天詩潯陽欲到思無
窮庾亮樓南湓口東固已承悞久矣張芸叟南遷錄

云庾陽鎮潯陽經始此樓其悞尤甚曼碩復爾承襲
未之深考也

余於元詩體要讀施鈞武昌南樓二聯云匡床老子
三更月鐵笛仙人一曲秋流水白雲吳夏口西風黃
鶴晉磯頭亦自雄渾

寓諷

詩話類編曰黃子肅為翰林供奉人有以且耕亭求詩
者黃贈詩云萬里扶搖鶴未回荷鋤聊復此徘徊閒雲

照水自舒卷幽鳥愛山時往來琴榻松風寒帶雨硯池
花露碧生苔且耕亭上春如錦想見斑衣戲老萊蓋其
人有親在堂乃遠游奔競曠其家園故詩寓意云爾

吳旦生曰子肅深於德機之學故其含辭託旨要有
古詩之義如送王君冕云君子希道德永言結同心
呈貢侍御云寄語東家兒紅粧莫輕嫁殷勤囑付河
梁何讓焉古樂府二首尤可愛玩一云君好錦繡韞
妾好明珠錦繡可為服服美令人愚不如珠夜光

可以照讀書又云君好春芍藥妾好夏池蓮芍藥多
艷色春風迷少年不如蓮有實可以壽君筵

銅爵硯

傳與礪銅爵硯歌云石麟暗刻魏春秋銅爵空題漢年
月

吳旦生曰按漢孝獻皇帝丙子改元建安至庚寅十
五年冬曹操作銅爵臺於鄴余於逆旅主人見一古
瓦長尺有三寸濶八寸質理堅潤穹腹背多饒紋中

有六字曰建安十五年造隸書凸起字徑寸餘此劉夢吉所云却愛曹瞞臺上瓦至今猶屬建安年也

道山清話云世傳銅爵瓦驗之有三錫花雷斧鮮疵三者是也然皆風雨彫錫不可得而偽東觀餘論云硯譜謂相州真古瓦朽腐不可用世俗尚其名爾今人乃以澄泥如古瓦狀埋土中久而研之近有長安民獻秦武公羽陽宮瓦十餘枚若今之甬瓦然首有羽陽千歲萬歲字其瓦殊不朽腐比相州瓦又增古

矣則知相州古瓦未必朽腐蓋傳聞之悞耳余觀洪武中宋季子得未央宮瓦頭一片上有未央長樂四字貝季翔作未央宮瓦頭歌此亦不減羽陽瓦也然觀偃曝談餘云銅雀瓦世傳鄴城古瓦夫魏之宮室焚蕩於汲桑之亂久矣鄴中記曰北高起鄴南城屋瓦皆以核桃油油之光明不蘚筒瓦覆故油其背版瓦仰故油其面筒瓦長二尺濶一尺版瓦之長亦如之而其濶倍之今得其真者當油處必有細紋俗曰

琴紋有白花曰錫花傳言當時以黃丹鉛錫和泥積
歲久而錫花見古磚大者方四尺上有盤花鳥獸紋
千秋萬歲字其紀年非天保則興和蓋東魏北齊也
又有磚筒者花紋年號如磚內員外方用承簷溜亦
可以為研鄴人有言曰銅雀瓦研體質細潤而堅如
石不費筆而發墨此古所重者而今絕無鄴民乃偽
造以給遠方王荊公詩吹盡西陵歌舞塵當時屋瓦
始稱珍甄陶往往成今手尚托虛名動世人又容齋

續筆云先公得二硯小者腹有六篆字曰大魏興和

年造中皆作小簇花團興和乃東魏孝靜帝紀年也

予為銘曰元魏之東狗脚於鄴

高澄侍宴以大觴屬孝靜帝帝不勝忿曰

自古無不亡之國朕何用生為澄怒曰朕狗脚朕

吁其瓦存亦禪千劫上林

得鴈獲貯歸笈玩而銘之哀淚棲睫又楊升菴云曹

操臺瓦已不可得宋人所收乃高歡避暑宮冰井臺

香姜閣瓦也予得一瓦上有香姜字又見京師人家

藏一瓦有元象字元象孝靜帝年號也

蜃戶

傅與礪送盧茂實之廣東憲幕云鮫宮織罷魚龍出蜃戶珠還蚌蛤來

吳旦生曰後山談叢云二廣居山谷間不隸州縣謂之徭人舟居謂之蜃人島上謂之黎人輟耕錄云廣東採珠之人懸絙於腰沈入海中良久得珠撼其絙舶上人挈出之葬於鼃鼃蛟龍之腹者比比有焉有司名曰烏蜃戶蜃音但桂海虞衡志云蜃海上水居

蠻也合浦珠池蚌蛤惟蜃能沒水採取先煮毳衲極
熱出水急覆之不然寒慄而死或遇蛟鼉所觸往往
潰腹折肢人見血一縷浮水面知蜃死矣升菴外集
云漁蜃取魚鰕蜃取鰕木蜃伐山皆生死短蓬間生
食海物其生如浮而各以疆界役於官

蕙蘭

堯山堂外紀曰蕙蘭寓殯湘中傳與礪念之不置賦詩
云湘皋煙翠碧紛紛淚灑東風憶細君浪說嫦娥能入

月虛疑神女解為雲花陰晝坐閒金剪竹裏春遊冷翠
裙留得舊時殘錦在傷心不忍讀迴文

吳旦生曰與礪誌其妻殯云君諱淑字蕙蘭姓孫氏
年二十三歸我於湘中五月而卒又序其遺藁云故
妻蕙蘭早失母父周卿先生以孝經論語及女誡之
書教之詩固未之學也因其弟受唐詩家法於庭得
其音格輒能為近體既卒出其藁得五言七首七言
十一首五七言未成章者廿六句編集成帙題曰綠

窓遺葉序而藏之其詩備載輟耕錄中皆雅秀可誦
特取一二絕句以見其大槩蕙蘭詩樓前楊柳發青
枝樓下春寒病起時獨坐小窓無氣力隔簾風亂海
棠絲綠窓寂寞掩殘春繡得羅衣懶上身昨日翠帷
新病起滿簾飛絮正愁人與礪追和詩小窓開盡碧
桃枝憶得青鸞化去時昨夜秋風妬幽怨夢中吹斷
素琴絲江上愁時復值春帶圍寬盡不宜身階前舊
種櫻桃樹日暮飛花故著人



歷代詩話卷六十六

欽定四庫全書

集部

歷代詩話卷六十七

詳校官侍讀學士臣陸伯燾

侍讀臣孫球覆勘

總校官知縣臣繆琪

校對官檢討臣饒慶捷

謄錄監生臣葉汝鎮

欽定四庫全書

歷代詩話卷六十七

歸安吳景旭撰

壬後集上之下

元詩

詩法正論

傳與礪述

或問作詩下手處先生曰作詩成法有起承轉合四字以絕句言之第一句是起第二句是承第三句是轉第

四句是合律詩則第一聯是起第二聯是承第三聯是轉第四聯是合或一題而作兩詩則兩詩通為起承轉合如子美詩中八月十五夜月二首滿目飛明鏡以下四句說客中對月是起水路凝雪霜以下四句形容月明是承稍下巫山峽以下四句言月出沒晦明之地就含結句之意是轉刁斗皆催曉以下四句言兵亂對月之感是合如作三首以上及作古詩長律亦以此法求之大抵起處要平直承處要舂容轉處要變化合處

要淵永起處戒陡頓承處戒促迫轉處戒落魄合處戒
斷送起處若必突兀則承處必不優柔轉處必至窘束
合處必至匱竭矣又以一詩全首論之須要有賦有比
有興或興而兼比尤妙三百篇多以比興重複置之章
首唐律多以比興作景聯古詩則比興或在起處或在
轉處或在合處長篇長律則轉處或有再轉三轉方合
者或作三四十韻以上則先須布置語意不可錯陳長
篇則當先得起句絕句則當先得後二句律詩則當先

得中四句律句固以對偶為工然得意處則意對而語不對亦可長篇古體則參差中時出整齊語尤見筆力最戒似對不對或曰如子美老夫清晨梳白頭玄都道士來相訪此二句是起語極平直似鄙俗而實非鄙俗也握髮呼兒延入戶手提新畫青松障此二句是承語便春容障子松林靜窈冥以下是轉已知仙客意相親更覺良工心獨苦是再轉語意極變化之妙松下丈人巾屨同以下是合乃借松障中實景與當時人事感

慨結之意兼此興可謂淵永之至矣及太白憶昔洛陽
董糟丘為余天津橋南造酒樓一詩往昔看此等起處
皆恠其朴陋今以起處要平直之說求之方知平生論
詩未及此也先生曰然此二詩起得有法故下面承轉
處自然春容變化然詩法有正有變如子美一片花飛
減却春風飄萬點正愁人起處似甚突兀然通篇意是
惜春起處正合如此乃痛快語而非陡頓語也且看欲
盡花經眼莫厭傷多酒入唇一句承上一句起下甚得

春容之體第三聯江上小堂巢翡翠苑邊高塚卧麒麟
就景物中寓感慨意政是轉處變化之法結句細推物
理須行樂何用浮名絆此身若非第七句沈着淵永則
第八句便有斷送之句矣又如送王司直詩云王郎酒
酣拔劍斫地歌莫哀我能拔爾抑塞磊落之奇才起處
亦甚突兀然意却平直大槩只是說王郎有雄豪之氣
之才耳與今人尚險詐者不同下面承兩句云豫章翻
風白日動鯨魚跋浪滄溟開此中說才字意便春容整

齊若不如此即非典雅之作亦接上兩句不住且脫劍
珮休徘徊以下三句是轉力量已極勻稱又就情景上
轉云仲宣樓頭春已深青眼高歌望吾子却以眼中之
人吾老矣一句結之七字而含無限之意勢力如截奔
馬此又詩之變而不離乎正者也又若太白詩云君不
見黃河之水天上來又有云棄我去者昨日之日不可
留亂吾心者今日之日多煩憂又曰攀天莫登龍走山
莫騎虎或以興為起或以比為起一皆不踰此法未可

以矢口成文視之也或曰子美醉歌行贈公安顏少府
請顧八題壁云神仙中人不易得顏氏之子才孤標天
馬長鳴待駕馭秋鷹整翮當雲霄君不見東吳顧文學
又不見西漢杜陵老詩家筆勢君不嫌詞翰升堂為君
掃是日霜風凍七澤烏蠻落照銜赤壁酒酣耳熱忘頭
白感君意氣無所惜一為歌行歌主客此詩法度與贈
王郎詩無一不合先生曰然又如范先生和鄧善之
詩云曩承持節江之東騎鯨再上蓬萊宮蓬萊仙人歌

白鶴聲落五湖煙雨中世間爵祿不易致何獨去就如
飄風朝廷禮樂須制作六經隱義資發蒙論思廟堂集
耆碩啟口寧讓前諸公閉門撥書古都市四方冠蓋方
隆隆我生生長在窮谷那有文字爭人雄謬蒙引諭百
僚上負祿府署慚無功一別十年今又五昔者少壯今
成翁誰知復客七閩下隔二千里來詩筒羸軀頓醒瘴
癘惡賴以慰此心忉忉越王城南浪自白越王城西花
自紅此以興為合者也又如虞公三鳳行贈海東之還

江南詩云海東之兄弟三人如鳳凰胸臆羽翮皆文章
九年三八天門翔伯冲天季驚人一日四海皆知名東
之之文五色雲見者眩晃生眇昏三進三已之了若耳
不聞二人得之喜未足云東之不愠乃可尊東書江上
還見親君子之樂樂最真君不見匡廬之山嶮崿而嵯
峨左界豫章渚川匯為蠡鄱其陰浩浩源句導岷經潛
沱山氣鬱蓄不得去上衝為紫蓋直與天相摩為雲覆
八極為雨漲九河海東之子能觀山以成德其進蓋未

可量也偶爾小屈奈爾何此以比興為轉者也又如楊
仲弘先生寄友詩云聞君遊宦處正值洞庭湖落日波
濤壯晴天島嶼孤舟帆通漢沔風物覽衡巫天下文章
弊非公孰起予此以興為承賦為轉者也又如揭曼碩
先生贈徐雲章詩云垂雲厲驚風萬里摩高圓蟠泥鼓
巨浪豈顧九重淵毛生入楚庭脫穎俄頃間粲粲徐公
子長咲起丘樊朝辭豫章臺暮過匡廬山大帆割鸚鵡
極目空波瀾黃鶴錦袍仙吹笙紫霞端相顧一笑粲青

春滿南天黃金築高臺更覺郭隗賢聯翩樂劇輩相逐
入幽燕平明九門開劍佩如雲煙豈無一字薦傾倒平
生言東風杏花開待我薊門前此以比興為起者也其
他有通首皆賦而無比興者在風雅頌各有其例但更
難作耳或又問曰周伯弼所編唐三體詩法以虛實二
字為例若四實中早春遊望詩及經廢寶林寺詩中四
句皆景物似與賦比興承轉之說不合何耶先生曰雲
霞出海曙梅柳渡江春於六義屬賦淑氣催黃鳥晴光

轉綠蘋於六義屬興池晴龜出曝松暝鶴飛迴兩句是
景物於六義屬興古砌碑橫草陰廊畫雜苔兩句是說
人事於六義屬賦伯弼以四實槩言之其說疎矣又曰
杜詩五七言絕句有四句皆對者又如何絕句者截句
也後兩句對者是截律詩前四句前兩句對者是截律
詩後四句四句皆對者是截律詩中四句四句皆不對
者是截律詩前後四句雖正變不齊而首尾布置亦四
句自為起承轉合未嘗不同條共貫也如杜詩遲日江

山麗是中庸天地位之意第二句春風花草香是萬物育之意起承處可謂平直而春容矣第三句第四句是申言萬物育之意然泥融飛燕子是言物之動者得其所也沙暖睡鴛鴦是言物之靜者亦得其所也轉合處可謂變化而淵永而升降開合之法見矣

詩法

黃子肅述

大凡作詩先須立意意者一身之主也如送人則言離別不忍相捨之意寄贈則言相思不得見之意題咏花

木之類則用離騷芳草之意故詩如馬意如善馭者折
旋操縱先後疾徐隨意所之無所不可此意之妙也又
如將之用兵或攻或戰或屯或守或出奇以取勝或不
戰以收功雖百萬之衆多多益辦而敵人莫能窺其神
此意之妙也意在於假物取意則謂之比意在於託物
興辭則謂之興意在於鋪張實事則謂之賦但貴圓活
透徹辭語相頡頏常使意在言表涵蓄有餘不盡乃為
佳耳是以妙悟者意之所向透徹玲瓏如空中之音雖

有所聞不可彷彿如象外之色雖有所見不可描摸如
水中之味雖有所知不可求索洞觀天地眇視萬物是
為高古剖出肺腑不借語言是為入神超達虛空了悟
生死是為離衆寄興悠揚因彼見此是為造巧隔闕寫
景不露形迹是為不俗故意在於閒適則全篇以雅淡
之言發之意在於哀傷則全篇以淒惋之情發之意在
於懷古則全篇以感慨之言發之此詩之悟意也意既
立必須得句句有法當以妙悟為上第一等句得於天

然不待雕琢律呂自諧神色兼備奇絕者如孤厓斷峯
高古者如黃鐘大呂飄逸者如清風白雲森嚴者如旌
旗甲兵雄壯者如千軍萬馬華麗者如奇花美女是為
妙句其次必須造語精工或動靜或大小或真假或生
死或遠近或今古或虛實或有無變化彷彿使一句之
中常具數節意乃為佳句是以洞觀天地之句似放誕
而非放誕了達生死之句似虛無而非虛無剖出肺腑
之句似粗俗而非粗俗寄興悠揚之句意之所至信手

拈來頭頭是道不待思索得之於自然隔闕寫景之句不落方體不犯正位不滯聲色左右上下無所不通似着題而非着題非悟者不能作也句既得矣於句中之字渾然天成者為佳下字必須清必須活必須響與一篇之意一句之意相通各自卓立而復相承是為本色若了達生死之句其字宜高古宜真率洞觀天地之句其字宜籠放宜開闢宜雄渾剖出肺腑之句其字宜沈著宜痛快寄興悠揚之句其字宜涵蓄不露宜優游不

迫隔闕寫景之句其字宜精工宜神奇宜飛動宜變化
宜峻峭宜飄逸每每有似真非真似假非假若有若無
若彼若此之意為得之總而言之詩之中必先得意
一句之中必先得字先得意後得句而字在乎其中不
待求索者上也若先得句因句之所在而生意或先或
後使意能成就其句之美者次也若先得字因字而生
句因字而生意復與句皆成其字之美者又其次也
故意也句也字也三者全備為妙悟意與句皆悟而字

有虧欠則為小疵若有意無句則精神無光有句無意則徒事粧點句意俱不足而惟於一字求工何足取哉然意之所忌者最忌用俗最忌議論議論則成文字而非詩用俗則淺近而非古句之所忌者最忌虛中之虛實中之實須虛中有實實中有虛字之所忌者最忌粧點最忌襯貼蓋非本句之所有而強牽合以成之是不可不知

詩宗正法眼藏

揭曼碩述

五言七言句語雖殊法律則一起句尤難起句先須潤
占地步要高遠不可苟且中間兩聯句法或四字截或
兩字截須要血脉貫通音韻相應對偶相停上下勻稱
有兩句共一意者有各意者若上聯已共意則下聯須
各意前聯既咏景狀後聯須說人事兩聯忌同律頸聯
轉意要變化須多下實字字實則自然響亮而句法健
其尾聯要能開一步別運生意結之然亦有合起意者
亦妙世之學者多用意中間兩聯而不知首尾起結尤

為難也

詩句中有字眼兩眼者妙三眼者非且二聯用連綿字不可一般中腰虛活字亦須迴避五言字眼多在第三或第二字或第四字或第五字

字眼在第三字

鼓角悲荒塞 江蓮搖白羽 竹光團野色

星河落曉山 天棘蔓青絲 含影漾江流

字眼在第二字

屏開金孔雀 碧知湖外草 坐對賢人酒

褥隱玉芙蓉 紅見海東雲 門聽長者車

字眼在第五字

兩行秦樹直 香霧雲鬟濕 市橋官柳細

萬點蜀山尖 清輝玉臂寒 江路野梅香

字眼在第二五字

地折江帆隱 野潤煙光薄 楚設關河險

天清水葉聞 沙暄日色遲 吳吞水府寬

杜詩法多在首聯兩句上句為領聯之主下句為頸聯之主七言律難於五言律七言下字較粗實五言下字較細嫩七言若可截作五字便不成詩須字字不可去方是所以句要藏字字要藏意如聯珠不斷為妙

古詩要法

凡作古詩體格句法俱要蒼古且先立大意鋪叙既定然後下筆則文脉貫通意無斷續整然可觀

五言古詩之法

或興起或比起或賦起須要寓意深遠托辭溫厚反覆
優游雍容不迫或感古懷今或懷人傷己或瀟灑閒適
寫景要雅淡推人心之至情寫感慨之微意悲喜含蓄
而不傷美刺宛曲而不露要有三百篇之遺意觀漢魏
諸古詩藹然有感動人處如古詩十九首皆當熟讀久
之自見其趣

七言古詩之法

要鋪叙得好要有開闔要風度要迢遞要險恠雄偉要

鏗鏘波瀾開闔如江海之波一波既作一波復隨又如
兵陣方以為正又復為奇方以為奇又復是正出入變
化不可紀極備是法者惟李杜也

長篇妙在鋪叙時將一聯挑轉又平平說將去如此轉
換數匝却以數語收拾則妙矣

木天禁語

范德機

六關

篇法 句法 字法 氣象 家數 音節

右一篇詩成必須精研合此六關方為佳不然則失之矣

篇法

有以字論者

有以意論者

有以故事論者

有以血脈論者

七言律詩篇法

十三格

一字血脈

鴛鴦

翠鬢紅衣舞夕暉
水禽情似此禽稀
纔分煙島猶

回首只度寒塘亦共飛映霧盡迷朱殿瓦逐梳齊
上玉人機采蓮無限蘭橈女笑指中流羨爾歸

二字貫穿

三字棟梁在內

江村

清江一曲抱村流長夏江村事事幽自去自來堂
上燕相親相近水中鷗老妻畫紙為棋局稚子敲
針作釣鉤多病所須惟藥物微軀此外更何求

三字棟梁

南遷

瘴江南下接雲煙望盡黃茅是海邊
山腹雨晴添象跡潭心日暖長蛟涎
射工巧伺遊人影颺母偏驚賈客船
從此憂來非一事可容華髮度流年

數字連序

中斷在內

中丞弟得除江陵并起居衛尚書夫人

中丞問俗畫熊頻愛弟傳書彩鷁新
遷轉九州防禦使起居八座太夫人
楚宮臘送荆門水白帝雲

偷碧海春為報惠連詩莫惜嗟予班鬢總如銀
鈎鎖連環

草

百花苑路易萋陰五穀塍疇苦見侵農父艾時嫌
若刺宮人闢處惜如金別離空惹王孫恨薦耨深
勞稷畷心綠野荒蕪好歸去朱門閒僻少相尋
順流直下

張鍊師

東岳真人張鍊師高情雅淡世間稀堪為烈女書
青簡久事元君住翠微金縷機中拋錦字玉清壇
上著霓衣雲衢不用吹簫伴只擬乘鸞獨自歸
雙拋

汴門用兵後

隋堤風物已淒涼堤下仍多古戰場金鉞有苔人
拾得鐵衣無土鳥銜將邊聲暗促河聲急野色遙
連日色黃獨上高城更愁絕戍輦驚起鴈行行

單拋

秋興 其七

昆明池水漢時功
武帝旌旗在眼中
織女機絲虛夜月
石鯨鱗甲動秋風
波漂菰米沈雲黑
露冷蓮房墜粉紅
關塞極天惟鳥道
江湖滿地一漁翁

內剝

玉臺觀

中天積翠玉臺遥
上帝高居絳節朝
遂有馮夷來

擊鼓始知羸女善吹簫江光隱見鼃鼃窟石勢參
差烏鵲橋更有紅顏生羽翼便應黃髮老漁樵

外刺

錦瑟

錦瑟無端五十絃一絃一柱思華年莊生曉夢迷
蝴蝶望帝春心托杜鵑滄海月明珠有淚藍田日
暖玉生煙此情可待成追憶只是當時已惘然

前散

送戴鍊師歸隱

桃花源裏玉堂仙，秀攬千巖萬壑煙。
有客重尋鑑湖酒，無人為上剡谿船。
龍行靈雨空壇淨，鰲負神宮複道懸。
回首都門眇如許，東風長記柳飛綿。

後散

二字貫穿在內

感興寄友

十年京國摠忘憂，詩酒淋漓共賞遊。
漢月夜吟鵲鵲觀，苑雲春釀鸛鸛裘。
書來慰我臨池上，秋去思

君到水頭為憶故人張處士於今江海尚淹留

五言長古篇法

分段 過脈 回照 讚歎

先分為幾段幾節每節句數多少要略均齊首段是序子序了一篇之意皆含在中結段要照起段且選詩分段節數甚均三句則皆三句四句六句八句則皆不參差杜却不甚如此太拘然亦不太長不太短也次要過句過句名為血脈引過次段

過處用兩句一結上一生下為最難非老手未易
了也回照謂十步一回頭要照題目五步一消息
要閒語讚歎方不甚迫促長篇怕亂雜一意為一
段以上四法備北征詩舉一隅之道也

七言長古篇法

分段 過段 突兀 字貫 讚歎

再起 歸題 送尾

分段如五言過段亦如之稍有異者突兀萬仞則

不用過句陡頓便說他事杜詩大多如此岑參專
尚此法為一家數字貫前後重三疊四用兩三字
貫串極精神好誦岑參所長讚歎如五言再起且
如一篇三段說了前事再提起從頭說去謂反覆
有情如魏將軍歌松樹障子歌是也歸題乃本末
一二句綴上起句又謂之顧首如蜀道難古別離
洗兵馬行是也送尾則生一段餘意結末或反用
或比喻用如墜馬歌曰君不見嵇康養生被殺戮

又曰如何不飲令人哀長篇有此便不迫促甚有
從容意思

五言短古篇法

辭簡意味長言語不可明白說盡含糊則有餘味
如步出城東門悵望江南路前日風雪中故人從
此去忽見明月光疑是地上霜起頭望明月低頭
思故鄉開簾見新月即便下階拜細語人不聞北
風吹裙帶

楊仲弘曰五言短古衆賢皆不知來處乃只是選
詩結尾四句所以含蓄無限意自然悠長此論惟
趙松雪翁承旨深得之次則豫章三日新婦曉得
清江知之却不多用

七言短古篇法

辭明意盡與五言相反如休洗紅洗紅紅色變不
惜故縫衣記得初揉齒人命百年能幾何後來新
婦今為婆 石人前石橋邊六角黃牛二頃田帶

經躬耕三十年

樂府篇法

張籍一王建為近體次之長吉虛妄不必效為岑
參有氣惜語硬又次之張王最古上格如焦仲卿
木蘭詞羽林郎霍家奴三婦詞大垂手小垂手等
篇皆為絕唱李太白樂府氣語皆自此中來不可
不知也

要訣在於反本題結如山農詞結却用西江賈客

珠百斛船中養犬多食肉是也又有含蓄不發結者又有截斷頓然結者如君不見蜀葵花是也

老翁家貧在山住耕種山田三四畝苗疎稅多不得食輸入官倉化為土歲暮鋤犁傍空室呼兒登山收橡栗西山賈客珠百斛船中養犬多食肉

絕句篇法

首句起 畫松

畫松一似真松樹待我尋思記得無曾在天台

山上見石橋南畔第三株

次句起 金陵即事

三句起 前二句皆閒至第三句方咏本題

扇對 存歿口號二首

席謙不見近彈碁畢曜仍傳舊小詩玉局他年
無限笑白楊今日幾人悲鄭公綵繪隨長夜曹
霸丹青已白頭天下何曾有山水人間不解重

驂騑

間對 首句閒次句說本題第三句閒結再說本
題應第二句即磨筭山詩也

順去 松下問童子 問余何事棲碧山

湘中老人 行到山窮水窮處 首座茶

藏咏 逢李龜年

岐王宅裏尋常見 崔九堂前幾度聞 正是江南
好風景 落花時節又逢君

中斷別意 前二句說本題後二句說題外意願

領龍驤十萬兵

四句不聯

兩箇黃鸝鳴翠柳 遲日江山麗

借喻 借本題說他事如咏婦人者必借花為喻
咏花者必借婦人為比

右十法絕句之篇法也此最為緊推此以往思過
半矣

句法

問答

誰其獲者婦與姑
何日東歸花發時

當對

白狐跳梁黃狐立
婦女行泣夫走藏

上三下四

鳳凰樂奏鈞天曲
烏鵲橋通織女河

上四下三

金馬朝回門似水
碧雞天遠路如年

上應下呼

素練抹林雲氣薄
明珠穿草露華新

上呼下應

林花著雨胭脂濕
水荇牽風翠帶長

行雲流水

春日鶯啼脩竹裏
仙家犬吠白雲中

顛倒錯亂

香稻啄殘鶗鴂粒
碧梧棲老鳳凰枝

言倒理順

海岸夜深常見日
寒巖四月始知春

議論語
宋人用之

直書句

鄭縣亭子澗之濱
一去三年竟不歸

兩句成一句

屢將心上事
相與夢中論

蕭蕭千里馬
箇箇五花文

字法

事文類聚事不可用多宋事也又不可用俚語偏
方之言摘用史記西漢書東漢書新舊唐書晉書
字樣集成聯對

一副當

白虎觀 金僕姑

碧雞坊 玉具櫛

眉語 從長

目成

護短

右用字琢對之法先須作三字對或四字對起然後拈排成全句不可逐句思量却似對偶不成作手也或二字對起亦可路頭差處在此捕風捉影如何成詩至謹至謹

氣象

翰苑 輦轂 山林 出世 倡頌 神仙

儒先

石屏之類
宋賢也

江湖

閭閻

末學

末學者道聽
塗說得一二

字面便雜採用去不成一家又在江湖間之下

已上氣象各隨人之資稟高下而發學者以變化
氣質須仗師友所習所讀以開導佐助然後能脫
去俗近以游高明謹之慎之又詩之氣象猶字畫
然長短肥瘦清濁雅俗皆在人性中流出得八法
便成妙染而洗吾舊態也

儲泳曰性情褊隘者其詞躁寬裕者其詞平端靖
者其詞雅疏曠者其詞逸雄偉者其詞壯醞藉者

其詞婉涵養性情發於色形於言此詩之本原也

家數

三百篇 思無邪 學者不察失於意見

離騷 激烈憤怒 學者不察失於哀傷

選詩 婉曲委順 學者不察失於柔弱

太白 雄豪空曠 學者不察失於狂誕

韓杜 沈雄厚壯 學者不察失於麓硬

陶韋 含蓄優游 學者不察失於迂濶

孟郊

奇險斬截

學者不察失於恠短

王維

典麗靜深

學者不察失於容冶

李商隱

微密閒艷

學者不察失於細碎

已上略舉八九家數一隅三反之道也

音節

馬御史曰四方偏氣之語不相通曉互相憎惡惟中州音韻四方可以通行四方之人皆喜於習說盖中州天地之中得氣之正聲音散佈各能相入

是以詩中宜用中州之韻則便官樣大凡押韻不可用啞韻如五微十四鹽啞韻也

凡例

只要明暗二例諸作皆然

杜甫鄭谷四詩可法

明二首

黑鷹

杜甫

黑鷹不省人間有渡海疑從北極來正翮搏風超
紫塞窮冬幾夜宿陽臺虞羅自覺虛施巧春鴈同

歸必見猜萬里寒空只一日金眸玉爪不凡材

雙鷺

鄭谷

三體作
雅陶

雙鷺應憐水滿池風飄不動頂絲垂立當青草人
先見行傍白蓮魚未知一足獨拳寒雨裏數聲相
叫早秋時林塘得爾須增價况與詩家物色宜

暗二首

白鷹

杜甫

雲飛玉立盡清秋不惜奇毛恣遠遊在野只教心

力破於人何事網羅求一生自獵知無敵百中爭
能耻下韝鵬礙九天須却避免經三窟莫深憂

鷓鴣

鄭谷

暖戲煙蕪錦翼齊品流應得近山雞雨昏青草湖
邊過花落黃陵廟裏啼遊子乍聞征袖濕佳人才
唱翠眉低相呼相喚湘江曲苦竹叢深春日西
起句

實叙 狀景 問答 反題故事 順題故事

吊古 傷今 頌美 時序 客愁

感歎

結句

勸戒 祝頌 自感 自愛 問信 寄憶

寄書 寄詩 相思 兵戈 我亦 懷古

故事 欣歡 景燕 激烈 何年遊

那可再 何由往 何日歸

已上凡例明暗并起句結句四法律詩絕句長短

篇通用無出此者惟童謠一家不在此例不可不知也

作詩準繩

楊仲弘

立意 要高古渾厚有氣緊要沈着忌卑弱淺陋

鍊句 要雄偉清健有金石聲

琢對 要寧粗毋弱寧拙毋巧寧朴毋華忌俗野

寫景 景中含意事中瞰景要細密清淡忌庸腐雕巧

寫意 要意中帶景議論發明

書事 大而國事小而家事身事心事

用事 陳古諷今因彼證此不可着迹只使影子可也

雖死事亦當活用

押韻 押韻穩健則一句有精神如柱礫欲其堅牢也
下字 或在腰或在膝在足最要精思宜的當

律詩要法 起 承 轉 合

破題 或對景興起或比起或引事起或就題起
要突兀高遠如狂風捲浪勢欲滔天

領聯 或寫意或寫景或書事用事引證此聯要

接破題要如驪龍之珠抱而不脫

頸聯

或寫意寫景書事用事引證與前聯之意

相應相避要變化如疾雷破山觀者驚愕

結句

或就題結或開一步或綴前聯之意或用

事必放一句作散場如剡谿之棹自去自

回言有盡而意無窮

七言

聲響 雄渾 鏗鏘 偉健 高遠

五言 沈靜 深遠 細嫩

五言古詩

與詩宗正
法眼藏同

七言古詩

與詩宗正
法眼藏同

絕句

絕句之法要婉曲回環刪蕪就簡句絕而意不絕
多以第三句為主而第四句發之有實接者有虛

接者承接之間開與合相關反與正相依順與逆
相應一呼一吸宮商自諧大抵起承二句固難然
不過平直叙起為佳從容承之為是至如宛轉變
化工夫全在第三句若於此轉變得好則第四句
如順流之舟矣

榮遇之詩要富貴尊嚴典雅渾厚寫意宜閒雅美麗清
細如王維賈至諸公早朝之作氣格雄深句意嚴整如
宮商迭奏音韻鏗鏘真麟游靈沼鳳鳴朝陽也學者熟

之可以一洗寒陋後來諸公應詔之作多用此體然多志驕氣盈處富貴而不失其正者幾希矣此又不可不知

諷諫之詩要感事陳辭忠厚懇惻諷諭甚切而不失性情之正觸物感傷而無怨懟之辭雖美實刺方為有益之言也古人凡欲諷諫多借此以喻彼臣不得於君多借妻以思其夫或托物陳喻以通其意觀漢魏古詩及前輩所作可見未嘗有無為而作者

登臨之詩不過感今懷古寫景嘆時思國懷鄉瀟灑遊適或譏刺歸美有一定之法律也中間宜寫四面所見山川之景庶幾移不動第一聯指所題之處宜叙說起第二聯合用景物實說第三聯合說人事或感歎古今或議論却不可用硬事或前聯先說事感歎則此聯寫景亦可但不可兩聯相同第四聯就題主意發感慨繳前二句或說何時再來

征行之詩要發出悽愴之意哀而不傷怨而不亂要發

興以感其事而不失情性之正或悲時感事觸物寓情
方可若傷亡悼屈一切哀怨吾無取焉

贈別之詩當寫不忍之情方見襟懷之厚然亦有數等
如別征戍則寫死別而勉之努力效忠送人遠遊則寫
不忍別而勉之及時早回送人仕宦則寫喜別而勉之
憂國恤民或訴已窮居而望其薦拔如杜公惟待吹噓
送上天之說是也凡送人多托酒以將意寫一時之景
以興懷寓相勉之辭以致意第一聯叙題意起第二聯

合說人事或叙別或議論第三聯合說景或帶思慕之情或說事第四聯合說何時再會或囑付或期望於中二聯或倒亂前說亦可但不可重複須要次第末句要有規警意味淵永為佳


詠物之詩要托物以伸意要二句詠狀寫生忌極雕巧第一聯須合直說題目明白物之出處方是第二聯合咏物之體第三聯合咏物之用或說意或議論或說人事或用事或將外物體證第四聯就題外生意或就本

意結之

讚美之詩多以慶喜頌禱期望為意貴乎典雅渾厚用
事宜的當親切第一聯要平直或隨事命意叙起第二
聯意相承或用事必須實說本題之事第三聯轉說要
變化或前聯不曾用事此正宜用引證盖有事料則詩
不空疎結句則多期望之意大抵頌德貴乎實若褒之
太過則近乎諛讚美不及則不合人情而有淺陋之失
矣

賡和之詩當觀元詩之意如何以其意和之則更新奇
要造一兩句雄健壯麗之語方能壓倒元白若又隨元
詩脚下走則無光彩不足觀其結句當歸着其人方得
體有就中聯歸着者亦可

哭挽之詩要情真事實於其人情義深厚則哭之無甚
情分則挽之而已矣當隨人行實作要切題使人開口
讀之便見是哭挽某人方好中間要隱然有傷感之意



歷代詩話卷六十七